

本草纲目 虫部 第三十九卷

蜂蜜

【释名】蜂糖、石蜜、石饴、岩蜜。

【气味】甘，平，无毒。



【主治】心腹邪气，诸惊痫瘵，安五脏诸不足，益气补中，止痛解毒，除众病，和百药。久服，强志轻身，不饥不老，延年神仙。本经。养脾气，除心烦，饮食不下，止肠游，肌中疼痛，口疮，明耳目。别录。牙齿疳蠹，唇口疮，目肤赤障，杀虫。藏器。治卒心痛及赤白痢，水作蜜浆，顿服一碗止；或以姜汁同蜜各一合，水和顿服。常服，面如花红。甄权。治心腹血刺痛，及赤白痢，同生地黄汁各一匙服，即下。孟诜。同薤白捣，涂汤火伤，即时痛止。宗奭。肘后用白蜜涂上，竹膜贴之，日三。和营卫，润脏腑，通三焦，调脾胃。时珍。

蜜蜡

【气味】甘，微温，无毒。

【主治】蜜蜡：主下痢脓血，补中，续绝伤金疮，益气，不饥，耐老。本经。〔权曰〕和松脂、杏仁、枣肉、茯苓等分合成，食后服五十丸，便不饥。〔颂曰〕古人荒岁多食蜡以度饥，但合大枣咀嚼，即易烂也。白蜡：疗人泄瀉后重见白脓，补绝伤，利小儿。久服，轻身不饥。别录。孕妇胎动，下血不绝，欲死。以鸡子大，煎三五沸，投美酒半升服，立瘥。又主白发，镊去，消蜡点孔中，即生黑者。甄权。

蜜蜂

【释名】蜡蜂。

蜂子

【气味】甘，平，微寒，无毒。

【主治】头疯，除蛊毒，补虚羸伤中。久服令人光泽，好颜色，不老。本经。〔弘景曰〕酒渍傅面，令人悦白。轻身益气，治心腹痛，面目黄，大人小儿腹中五虫从口吐出者。

别录。主丹毒风疹，腹内留热，利大小便涩，去浮血，下乳汁，妇人带下病。藏器。大风痲疾。时珍。

【附方】新一。大风痲疾须眉堕落，皮肉已烂成疮者。用蜜蜂子、胡蜂子、黄蜂子并炒各一分，白花蛇、乌蛇并酒浸去皮骨炙干，全蝎去土炒，白姜蚕炒各一两，地龙去土炒半两，蝎虎全者炒，赤足蜈蚣全者炒各十五枚，丹砂一两，雄黄醋熬一分，龙脑半钱，右为末。每服一钱匕，温蜜汤调下，日三五服。总录。



土蜂

【释名】蜚零、螻蜂、马蜂、大蜂。

蜂

【主治】烧末，油和，傅蜘蛛咬疮。〔藏器曰〕此物能食蜘蛛，取其相伏也。

蜂子

【气味】甘，平，有毒。

【主治】痲肿。本经。噬痛。别录。利大小便，治妇人带下。日华。功同蜜蜂子。藏器。酒浸傅面，令人悦白。时珍。

